

**БОСНА И ХЕРЦЕГОВИНА
ПАРЛАМЕНТАРНА СКУПШТИНА
БОСНЕ И ХЕРЦЕГОВИНЕ**

ДОМ НАРОДА
ПРЕДСТАВНИЧКИ ДОМ

Огранак Глобалне организације
парламентарца за борбу против корупције
(ГОПАК)



**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE**

DOM NARODA
PREDSTAVNIČKI DOM / ZASTUPNIČKI DOM

Ogranak Globalne organizacije
parlamentaraca za borbu protiv korupcije
(GOPAC)

Broj: 05/5-50-14-104-3/17

Sarajevo, 18. 4. 2017.

**PROGRAM RADA OGRANKA GLOBALNE ORGANIZACIJE
PARLAMENTARACA ZA BORBU PROTIV KORUPCIJE U
PARLAMENTARNOJ SKUPŠTINI BOSNE I HERCEGOVINE**

Sarajevo, april 2017. godine

SADRŽAJ

I. <u>UVOD</u>	
1. Razlozi i svrha formiranja Ogranka GOPAC-a u PSBiH	3
2. Ciljevi Ogranka GOPAC-a u PSBiH	3
3. Osnovni zadaci i aktivnosti Ogranka GOPAC-a u PSBiH	4
II. <u>PLAN AKTIVNOSTI Ogranka GOPAC-a u PSBiH ZA PERIOD 2017. - 2018. GODINA</u>	6
❖ CILJ 1. - FORMIRANJE ORGANIZACIONE STRUKTURE I ZAPOČINJANJE REDOVNIH AKTIVNOSTI	6
1.1. Rad na plenarnim sjednicama i promocija GOPAC-a i njegovih ciljeva kroz aktivnosti članova Ogranka GOPAC-a u PSBiH	6
1.2. Osiguranje finansijskih sredstava za realizaciju aktivnosti	7
1.3. Saradnja s parlamentarcima država Evrope i centralne Azije	7
1.4. Osnivanje regionalnog ogranka GOPAC-a	7
1.5. Rad sa Sekretarijatom GOPAC-a i globalnim ograncima s ciljem razmjene iskustava i unapređenja rada	8
❖ CILJ 2. - UNAPREĐENJE KAPACITETA POSLANIKA I DELEGATA U PARLAMENTARNOJ SKUPŠTINI BiH	9
2.1. Organizacija i provođenje radionica	9
2.2. Osiguranje međunarodne ekspertne podrške u jačanju kapaciteta i razvoju Ogranka GOPAC-a u PSBiH.....	9
❖ CILJ 3. - PREDSTAVLJANJE REZULTATA, KOMUNIKACIJA S GRAĐANIMA I PODIZANJE SVIJEŠTI O ZNAČAJU SUZBIJANJA KORUPCIJE	10
3.1. Omogućavanje transparentnosti rada i informiranje javnosti o aktivnostima Ogranka GOPAC-a u PSBiH	10
3.2. Promocija zakonodavstva značajnog za borbu protiv korupcije	11
3.3. Saradnja s organizacijama civilnog društva, akademskom zajednicom i medijima	11
3.4. Saradnja s nezavisnim državnim organima i pravosudnim organima	11
❖ CILJ 4. - AKTIVNOSTI OGRANKA GOPAC-a U PSBiH NA DOMAĆEM, REGIONALNOM I MEĐUNARODNOM PLANU	13
4.1. Učešće na Globalnoj konferenciji GOPAC-a	13
4.2. Učešće na regionalnim sastancima GOPAC-a	13

I. UVOD

1. RAZLOZI I SVRHA FORMIRANJA OGRANKA GOPAC-a U PSBiH

Globalna organizacija parlamentaraca za borbu protiv korupcije (GOPAC) je registrirana, neprofitna organizacija, koja okuplja parlamentarce i druge osobe u zemlji, prevashodno s ciljem borbe protiv korupcije.

Parlamentarni ogranci GOPAC-a u zemljama članicama formiraju se, prije svega, radi efektivnosti u provođenju promjena i davanju konkretnih rezultata na polju borbe protiv korupcije. Ovi ogranci imaju razvijene sposobnosti za fokusiranje na određene konkretne oblasti djelovanja, kao na ključne probleme svoje zemlje kada je u pitanju borba protiv korupcije.

GOPAC je formiran 2002. godine kao rezultat Globalne konferencije održane u Otavi (Kanada), koja je okupila 170 poslanika i 400 posmatrača posvećenih borbi protiv korupcije i uspostavljanju odgovornog upravljanja. Od tada pa do danas GOPAC pruža podršku svojim članicama prije svega u pitanjima kao što su: promocija i primjena UN-ove Konvencije za borbu protiv korupcije (UNCAC), sprečavanje pranja novca, nadzor nad radom državnih vlada i trošenja javnih finansija, te uspostavljanje etičkih pravila ponašanja za poslanike i njihovo uključivanje u ukupnu borbu protiv korupcije.

Polazeći od utvrđenih prioriteta i ciljeva GOPAC-a, ovaj dokument razrađuje i predstavlja program rada Ogranka Globalne organizacije parlamentaraca za borbu protiv korupcije u Parlamentarnoj skupštini Bosne i Hercegovine (Ogranak GOPAC-a u PSBiH) za 2017. i 2018. godinu. Programom se nastoji u punoj mjeri omogućiti efikasna borba protiv korupcije i ostvarivanje konkretnih rezultata, imajući u vidu pretpristupnu poziciju Bosne i Hercegovine kao potencijalne članice Evropske unije.

Prvi dio ovog dokumenta predstavlja ciljeve Ogranka GOPAC-a u PSBiH, te njegove osnovne zadatke i aktivnosti.

2. CILJEVI OGRANKA GOPAC-a U PSBiH

U skladu s članom 6. Povelje Globalne organizacije parlamentaraca za borbu protiv korupcije u Parlamentarnoj skupštini BiH, osnovni ciljevi Ogranka GOPAC-a u PSBiH su prevencija i borba protiv korupcije, promoviranje principa transparentnosti i odgovornosti u Parlamentarnoj skupštini Bosne i Hercegovine, kako bi se osigurali široki standardi integriteta, a naročito:

- a) realizacija ciljeva Globalne organizacije koji se odnose na uspostavljanje standarda ponašanja, s ciljem promocije transparentnosti, odgovornosti i dobrog upravljanja,
- b) promocija vladavine prava i odgovornosti institucija vlasti u BiH,

- c) razvoj kapaciteta Parlamentarne skupštine Bosne i Hercegovine s ciljem jačanja njene kontrolne funkcije i demokratskog nadzora institucija izvršne vlasti na nivou BiH,
- d) omogućavanje razmjene informacija, znanja, najboljih praksi i iskustava među članovima Ogranka GOPAC-a u PSBiH u vezi s mjerama borbe protiv korupcije,
- e) podsticanje poslanika i delegata iz oba doma PSBiH s ciljem donošenja zakonskih rješenja kojima se promoviraju transparentnost, odgovornost i efikasno upravljanje,
- f) promoviranje mjera usmjerenih na efikasno rješavanje pitanja korupcije i podizanje svijesti o problemu korupcije na svim nivoima društva,
- g) edukacija poslanika i delegata u PSBiH o oblicima, karakteru i načinu prevencije i borbe protiv korupcije,
- h) djelovanje s ciljem poboljšanja sposobnosti institucija BiH da se efikasno nose s korupcijom,
- i) saradnja s domaćim i regionalnim organima na mobilizaciji resursa za antikorupcijske programe, uključujući i:
 - podršku aktivnostima drugim ograncima Globalne organizacije u svijetu,
 - razmjenu informacija putem internetskih stranica, elektronske pošte i drugih servisa,
 - učešće u seminarima i radionicama o prevenciji i borbi protiv korupcije,
 - povezivanje i saradnju s međunarodnim organizacijama, parlamentima drugih zemalja, institucijama izvršne vlasti, kao i pravosudnim institucijama, civilnim društvom i drugim organizacijama o svim pitanjima u vezi s unapređenjem njihovog rada, transparentnosti i odgovornosti,
 - provođenje istraživanja, razmjenu informacija i dostavljanje podataka o najboljim praksama i iskustvima i
 - promoviranje angažiranosti članova Ogranka GOPAC-a u PSBiH, a time i ciljeva Globalne organizacije, te
- j) provođenje drugih aktivnosti kojima se pruža podrška i promovira realizacija ciljeva GOPAC-a

3. OSNOVNI ZADACI I AKTIVNOSTI OGRANKA GOPAC-a U PSBiH

Svi članovi Ogranka GOPAC-a u PSBiH imaju posebnu odgovornost da:

- promoviraju zakone koji jačaju integritet institucija društva, podržavaju transparentnost i odgovornost i bore se protiv korupcije u Bosni i Hercegovini,
- izgrađuju posvećenost i kapacitet Parlamentarne skupštine BiH za vršenje nadležnosti, posebno u vezi s pitanjima javnih finansija,
- razmjenjuju informacije, naučene lekcije i najbolje vidove i prakse,
- iniciraju i provode projekte za smanjenje korupcije i promoviranje dobrog upravljanja,
- saraduju s međunarodnim finansijskim institucijama i organizacijama civilnog društva na zajedničkim ciljevima,

- prepoznaju i podržavaju važnost vladavine prava u razvoju otvorenog, slobodnog i produktivnog društva.

U tom okviru Ogranak GOPAC-a u PSBiH preduzima set aktivnosti koje uključuju:

1. iniciranje zakona u vezi s pitanjima koja se odnose na prevenciju i borbu protiv korupcije u Parlamentarnoj skupštini BiH,
2. analizu postojećeg zakonodavstva i praćenje provođenja zakonskih propisa u vezi sa suzbijanjem korupcije u BiH,
3. uspostavljanje mreža za podršku aktivnostima u borbi protiv korupcije i saradnja s relevantnim institucijama,
4. jačanje kapaciteta parlamentaraca za borbu protiv korupcije pružanjem podrške putem organizacije stručnih obuka, znanja i vještina u borbi protiv korupcije,
5. saradnju s ključnim institucijama na poboljšanju uslova za borbu protiv korupcije u BiH, organizacijama civilnog društva / nevladinog sektora, akademske zajednice i medija,
6. saradnju s ograncima GOPAC-a u zemljama regiona, te preduzimanje aktivnosti s ciljem osnivanja regionalnog ogranka GOPAC-a, te
7. izvještavanje Parlamentarne skupštine BiH o aktivnostima Ogranka GOPAC-a u PSBiH i javno predstavljanje rezultata u borbi protiv korupcije.

II. PLAN AKTIVNOSTI OGRANKA GOPAC-a U PSBiH ZA PERIOD 2017. - 2018. GODINA

❖ CILJ 1. - FORMIRANJE ORGANIZACIONE STRUKTURE I ZAPOČINJANJE REDOVNIH AKTIVNOSTI

Na konstituirajućoj sjednici, koja je u organizaciji UNDP-ja BiH održana 9. decembra 2016. godine u zgradi Parlamentarne skupštine BiH, osnovan je Ogranak GOPAC-a u PSBiH. Članovi Ogranka GOPAC-a u PSBiH, koji dolaze iz oba doma PSBiH, potpisali su Povelju Globalne organizacije parlamentaraca za borbu protiv korupcije u Parlamentarnoj skupštini BiH, čime je naša zemlja postala 60. zemlja potpisnica koja se pridružila ovoj globalnoj organizaciji.

S ciljem izrade adekvatnog programa rada i plana aktivnosti za naredni period, članovi Ogranka GOPAC-a u PSBiH nakon konstituiranja boravili su u Narodnoj skupštini Republike Srbije gdje su s članovima srbijanskog GOPAC-a razgovarali o njihovim iskustvima u formiranju ovog ogranka, kao i o realizaciji aktivnosti iz njihovog programa rada u prethodne tri i po godine, koliko nacionalni ogranak GOPAC-a djeluje u Srbiji.

Nakon toga, Ogranak GOPAC-a u PSBiH izabrao je Izvršni odbor koji je sastavljen od predsjedavajućeg Ogranka, njegovog prvog i drugog zamjenika, koji dolaze iz tri konstitutivna naroda u BiH, a koji će, u skladu s čl. 12. i 13. Povelje, rukovoditi radom Ogranka u narednom periodu.

1.1 Rad na plenarnim sjednicama i promocija GOPAC-a i njegovih ciljeva putem aktivnosti članova Ogranka GOPAC-a u PSBiH

Članovi Ogranka GOPAC-a u PSBiH aktivno će promovirati GOPAC i njegove ciljeve putem svojih aktivnosti u PSBiH, posebno u postupku donošenja zakonskih rješenja, kao i ukazivanjem na predložena zakonska rješenja koja mogu biti uzrok korupcije, kako bi svojim ličnim, nadstranačkim zalaganjem pokazali svoje opredjeljenje i pružili doprinos u borbi protiv korupcije.

Članovi Ogranka GOPAC-a u PSBiH izražavaju opredjeljenje da se ovaj ogranak bavi i prijedlozima zakona sa stanovišta rizika na korupciju, odnosno eliminiranja koruptivnih potencijala u zakonskim rješenjima čije se donošenje predlaže. U vezi s tim, članovi ovog ogranka prepoznaju institute javnog saslušanja i javne rasprave kao izuzetno korisne mehanizme parlamentarne prakse koji omogućavaju da se u razmatranje svih aspekata određenog problema ili propisa uključe sve zainteresirane strane, s ciljem pronalaska najboljeg rješenja i predupređivanja eventualnih negativnih efekata. Članovi Ogranka GOPAC-a u PSBiH će u okviru svojih redovnih aktivnosti u radu stalnih radnih tijela oba doma PSBiH, čiji su oni članovi, predlagati održavanje javnih saslušanja.

1.2 Osiguranje finansijskih sredstava za realizaciju aktivnosti i potpisivanje memoranduma o saradnji

Osnivanje Ogranaka GOPAC-a u PSBiH podržao je Razvojni program Ujedinjenih naroda (UNDP) u BiH putem Projekta „Jačanje ključnih institucija zaduženih za borbu protiv korupcije u BiH“, koji finansira Ambasada Norveške u BiH.

S obzirom na to da je navedeni projekat okončan s 31.12.2016., u narednom periodu potrebno je osigurati novu finansijsku i stručnu podršku, kako bi Ogranak GOPAC-a u PSBiH mogao adekvatno odgovoriti svim zadacima predviđenim ovim programom rada.

U vezi s tim, Ogranak GOPAC-a u PSBiH će obaviti razgovore s UNDP-jem, ali i svim drugim zainteresiranim međunarodnim organizacijama, fondacijama, institucijama i organizacijama civilnog društva koje, u skladu s članom 15. Povelje, putem svojih specijaliziranih projekata i programa mogu pružiti logističku podršku u radu Ogranaka GOPAC-a u PSBiH.

Predsjedavajući Izvršnog odbora Ogranaka GOPAC-a u PSBiH potpisat će, u ime Parlamentarne skupštine BiH, memorandum o saradnji s organizacijama koje u okviru svojih projekata i programa budu pružale podršku u radu Ogranaka GOPAC-a u PSBiH na polju borbe protiv korupcije u Bosni i Hercegovini.

1.3 Saradnja s parlamentarcima država Evrope i centralne Azije

Međunarodna konferencija pod nazivom: „Transparentnost i odgovornost za djelotvoran nadzor: uloga parlamenta“, koja je održana u maju 2015. godine u Beogradu, postavila je okvir za regionalnu saradnju i rad Ogranaka GOPAC-a u PSBiH. Memorandum o razumijevanju koji je potpisan na ovoj konferenciji definirao je oblike saradnje na razvoju i primjeni aktivnosti čiji je cilj promocija potrebe za borbom protiv korupcije i povećanje transparentnosti rada parlamenata, kao i njegove kontrolne funkcije nad institucijama izvršne vlasti u našoj zemlji. U vezi s tim, Ogranak GOPAC-a u PSBiH će raditi na pitanjima kao što su: organizacija zajedničkih konferencija, seminara, radionica, sastanaka, obuka i edukativnih programa, zatim podrška razvijanju projekata saradnje, razmjena informacija o programima i zakonima koji se donose na nivou institucija BiH, te drugim oblicima regionalne saradnje.

1.4 Osnivanje regionalnog ogranaka GOPAC-a

Formiranjem ogranaka GOPAC-a u zemljama regiona, kao što su: Albanija, Azerbejdžan, Bosna i Hercegovina, Moldavija, Makedonija i Srbija, stvoreni su uslovi za formiranje regionalnog ogranaka GOPAC-a.

Države u regionu susreću se sa sličnim problemima i izazovima u borbi protiv korupcije, zbog čega je od izuzetne važnosti ostvarivanje bliže saradnje među njihovim parlamentima i ogranacima GOPAC-a. Formiranje regionalnog ogranaka GOPAC-a omogućilo bi redovnu komunikaciju poslanicima i delegatima oba doma PSBiH s članovima parlamenata u regionu,

razmjenu iskustava i međusobnu pomoć u borbi protiv korupcije i nadzoru nad radom izvršne vlasti. To ujedno predstavlja i ostvarivanje ciljeva proklamiranih Memorandumom o saradnji potpisanim na Međunarodnoj konferenciji pod nazivom: „Transparentnost i odgovornost za djelotvoran nadzor: uloga parlamenta“, održanoj u Beogradu u maju 2015. godine.

S ciljem djelotvornijeg rada na formiranju regionalnog ogranka, Ogranak GOPAC-a u PSBiH odredit će predstavnike koji će predstavljati ovaj ogranak u regionalnom ogranku GOPAC-a.

1.5 Rad sa Sekretarijatom GOPAC-a i globalnim ograncima s ciljem razmjene iskustava i unapređenja rada

Ogranak GOPAC-a kontinuirano će saradivati sa Sekretarijatom GOPAC-a u oblasti parlamentarne kontrole i borbe protiv korupcije, što omogućava sagledavanje i praćenje globalnih trendova.

Globalna konferencija GOPAC-a, koja se organizira svake druge godine s ciljem okupljanja lidera, članova, budućih članova, donatora i drugih zainteresiranih učesnika kako bi podstakli, inspirirali, obrazovali i pomogli rad i kontinuiranu borbu protiv korupcije ogranaka GOPAC-a i njihovih članova.

Ogranak GOPAC-a u PSBiH odredit će predstavnika koji će o svom radu obavještavati Sekretarijat GOPAC-a i koji će učestvovati u radu Globalne konferencije.

❖ **CILJ 2. - UNAPREĐENJE KAPACITETA POSLANIKA I DELEGATA U PSBiH**

Kako bi Parlamentarna skupština BiH unaprijedila svoju kontrolnu funkciju i efikasnije vršila nadzor nad radom organa izvršne vlasti, potrebno je podizanje svijesti o značaju borbe protiv korupcije i stručno usavršavanje poslanika i delegata iz ove oblasti. U vezi s tim, u saradnji s organizacijama koje budu pružale logističku podršku u njegovom radu, Ogranak GOPAC-a u PSBiH u narednom periodu organizirat će radionice za svoje članove i osigurati podršku međunarodnih eksperata, s ciljem razvoja i jačanja svojih kapaciteta.

2.1. Organizacija i provođenje radionica

U saradnji s međunarodnim organizacijama, organizacijama civilnog društva i akademskom zajednicom, planirano je održavanje radionica u kojima će učestvovati članovi GOPAC-a. Tematski okvir radionica bio bi određen na osnovu prijedloga članova Ogranka GOPAC-a u PSBiH, kao i ključnih prioriteta Globalne organizacije prilagođenih prilikama u Bosni i Hercegovini, te prioriteta Parlamentarne skupštine BiH.

Tematski okvir je sljedeći:

- Upoznavanje s Konvencijom Ujedinjenih naroda o borbi protiv korupcije (UNCAC), te ulogom Bosne i Hercegovine i Parlamentarne skupštine BiH u njenom provođenju,
- Upoznavanje sa zakonodavstvom značajnim za borbu protiv korupcije u BiH,
- Upravljanje javnim finansijama: planiranje budžeta, koruptivni rizici, kontrola zakonitosti, svrsishodnosti i efikasnosti trošenja javnih sredstava,
- Lični i institucionalni integritet poslanika i delegata, te slika PSBiH u javnosti,
- Saradnja Parlamentarne skupštine BiH i nezavisnih državnih organa (Ured za reviziju institucija BiH, Agencija za prevenciju korupcije i koordinaciju borbe protiv korupcije, Tužilaštvo BiH, Ured za žalbe...),
- Saradnja Parlamentarne skupštine BiH s akademskom zajednicom, organizacijama civilnog društva i medijima.

2.2. Osiguranje međunarodne ekspertne podrške u jačanju kapaciteta i razvoju Ogranka GOPAC-a u PSBiH

U skladu s članom 15. Povelje, podršku u radu Ogranka GOPAC-a u PSBiH, kao nestranačke i dobrovoljne parlamentarne grupe, daju međunarodne organizacije, fondacije, institucije, kao i organizacije civilnog društva, putem logističke podrške i specijaliziranih projekata i programa. U vezi s tim, Ogranak GOPAC-a u PSBiH bit će u stalnoj komunikaciji s navedenim organizacijama, fondacijama i institucijama, s ciljem traženja podrške i iniciranja međusobne saradnje. Ogranak GOPAC-a u PSBiH bit će u stalnoj komunikaciji i sa Sekretarijatom Globalne organizacije i međunarodnim ekspertima u jačanju kapaciteta Ogranka GOPAC-a u PSBiH u onim oblastima koje se pokažu potrebnim u njegovom radu.

❖ CILJ 3. - PREDSTAVLJANJE REZULTATA, KOMUNIKACIJA S GRAĐANIMA I PODIZANJE SVIJEŠTI O ZNAČAJU SUZBIJANJA KORUPCIJE

Uspješna borba protiv korupcije nije moguća bez aktivnog uključivanja svih segmenata društva. Dugoročni cilj razvoja svijesti o nepristajanju na bilo koji oblik i stepen korupcije, kao i promoviranje aktivne borbe građana protiv korupcije zahtijeva konkretne učinke u suzbijanju korupcije u BiH, a u skladu s tim i jačanje povjerenja građana u našoj zemlji u Ogranak GOPAC-a u PSBiH.

Također, Parlamentarna skupština BiH je odgovorna, prije svega građanima, i upravo u njima treba da traži glavnog partnera u vršenju nadzora nad javnim finansijama. Transparentnost i odgovornost nije moguća bez aktivnog uključivanja svih slojeva društva. Komunikacija s građanima podrazumijeva, s jedne strane, informiranje javnosti o preduzetim koracima u borbi protiv korupcije, ali se, s druge strane, ne ograničava samo na jednosmjernu komunikaciju već tu mora da uključi i različite oblike konsultacija i dijaloga s organizacijama civilnog društva.

U vezi s tim, Ogranak GOPAC-a u PSBiH informirat će javnost o svojim aktivnostima putem internetske stranice PSBiH, podstičući pri tome učešće građana i informiranost javnosti o konkretnim aktivnostima ovog ogranka, napretku u njegovom radu, te unapređenju transparentnosti i odgovornosti, kao i o primjerima dobre prakse kako u BiH tako i u drugim državama.

3.1.Omogućavanje transparentnosti rada i informiranje javnosti o aktivnostima Ogranka GOPAC-a u PSBiH

Ogranak GOPAC-a u PSBiH će redovno putem internetske stranice PSBiH i informiranjem medijskih kuća u BiH podsticati transparentnost rada PSBiH i informirati javnost o konkretnim aktivnostima i napretku u prevenciji i borbi protiv korupcije u BiH, kao i o primjerima dobre prakse i u BiH i u drugim državama.

Aktivnosti koje bude provodio Ogranak GOPAC-a u PSBiH bit će objavljivane na internetskoj stranici Parlamentarne skupštine BiH, u dijelu koji se odnosi na rad ovog ogranka. U okviru sadržaja, osim podataka za kontaktiranje Ogranka GOPAC-a u PSBiH, na internetskoj stranici PSBiH bit će predstavljeni osnovni dokumenti u skladu s kojima djeluje ovaj ogranak, njegovi članovi, te informacije o osnovnim nadležnostima Ogranka GOPAC-a u PSBiH, održanim sjednicama, kao i godišnjim izvještajem o radu i ostalim aktivnostima.

Putem internetske stranice PSBiH vanjska javnost moći će neposredno putem elektronske pošte kontaktirati članove Ogranka GOPAC-a u PSBiH, poslati im upit, te im predlagati zakonske i druge inicijative, te inicirati postavljanje poslaničkih i delegatskih pitanja nadležnim institucijama.

O aktivnostima Ogranka GOPAC-a u PSBiH na polju borbe protiv korupcije u Bosni i Hercegovini javnost u BiH bit će upoznata i posredstvom informativnih glasila i brošura PSBiH.

Po okončanju sjednica Ogranka GOPAC-a u PSBiH, kao i drugih aktivnosti predviđenih ovim programom rada, članovima će biti omogućeno davanje izjava za medije, te će najšira javnost u BiH biti informirana o najvažnijim aktivnostima Ogranka GOPAC-a u PSBiH.

3.2. Promocija zakonodavstva značajnog za borbu protiv korupcije

Ogranak GOPAC-a u PSBiH će putem internetske stranice PSBiH, te blagovremenim dostavljanjem informacija predstavnicima elektronskih i printanih medija upoznati javnost u BiH o realizaciji aktivnosti koje proizlaze iz obaveze države prema Konvenciji UN-a o borbi protiv korupcije, kao i relevantnim zakonskim prijedlozima, te već usvojenim zakonskim rješenjima značajnim za borbu protiv korupcije u BiH i radom organa izvršne vlasti.

U narednom periodu Ogranak GOPAC-a u PSBiH inicirat će donošenje novih, kao i izmjene i dopune postojećih zakonskih rješenja kojima će uticati na suzbijanje korupcije u našoj zemlji.

3.3. Saradnja s organizacijama civilnog društva, akademskom zajednicom i medijima

Djelovanje Ogranka GOPAC-a u PSBiH podrazumijeva i širu društvenu aktivnost i uspostavljanje saradnje s organizacijama civilnog društva, s ciljem osiguranja visokih standarda integriteta i zaštite javnog interesa u vršenju javnih funkcija i društvenom komuniciranju. U vezi s tim, Ogranak GOPAC-a u PSBiH razmotrit će i mogućnost neposredne saradnje i potencijalne savjetodavne funkcije organizacija civilnog društva koje se direktno bave pitanjima borbe protiv korupcije, a koje bi svojim iskustvom mogle pružiti podršku u radu Ogranka GOPAC-a u PSBiH.

Ogranak GOPAC-a u PSBiH inicirat će održavanje konsultativnih sastanaka s predstavnicima civilnog društva, akademske zajednice i medija, na kojima bi se razmotrile mogućnosti zajedničke saradnje i djelovanja u borbi protiv korupcije, te ih pozvati da upoznaju članove ovog ogranka s rezultatima svojih istraživanja, analiza i izvještaja koji se odnose na projekte borbe protiv korupcije.

3.4. Saradnja s nezavisnim državnim organima i pravosudnim organima

Ogranak GOPAC-a u PSBiH uspostaviti će stalnu komunikaciju i saradnju s nezavisnim državnim organima. U vezi s tim, Ogranak GOPAC-a u PSBiH će posebnu pažnju posvetiti saradnji s Agencijom za prevenciju korupcije i koordinaciju borbe protiv korupcije, Uredom za reviziju institucija BiH, kao i nadležnim pravosudnim organima koji se bave pitanjima prevencije i borbe protiv korupcije u našoj zemlji, naročito u dijelu koji se odnosi na redovne izvještaje o radu ovih institucija.

U saradnji s nadležnim parlamentarnim komisijama, Ogranak GOPAC-a u PSBiH radit će na razmjeni informacija i pratiti provođenje preporuka i zaključaka koje domovi PSBiH donose

povodom izvještaja nezavisnih državnih organa, u skladu sa Strategijom za borbu protiv korupcije 2015. - 2019. i Akcionim planom za njeno provođenje.

S ciljem ukazivanja na značaj izvještaja i preporuka nezavisnih državnih organa u borbi protiv korupcije, kao i na efikasniju kontrolu nad radom organa izvršne vlasti, te analize mehanizama za daljnje postupanje po njihovim izvještajima, saradnja s nezavisnim državnim organima bit će operacionalizirana kroz konsultativne sastanke, radionice i javna saslušanja.

❖ CILJ 4. - AKTIVNOSTI OGRANKA GOPAC-a U PSBiH NA DOMAĆEM, REGIONALNOM I MEĐUNARODNOM PLANU

Saradnja s regionalnim i međunarodnim parlamentarnim tijelima i mrežom GOPAC-a od izuzetnog je značaja za unapređenje rada Ogranka GOPAC-a u PSBiH, za razmjenu pozitivnih iskustava i praksi, kao i za promociju rezultata Ogranka GOPAC-a u PSBiH u borbi protiv korupcije. Globalna organizacija sa svojom mrežom pomoći će ograncima u državama

članicama GOPAC-a u razvoju programa izgradnje kapaciteta s promocijom i podsticanjem istraživanja i studija iz oblasti borbe protiv korupcije.

4.1. Učešće na Globalnoj konferenciji GOPAC-a

Globalna konferencija GOPAC-a organizira se svake druge godine s ciljem okupljanja lidera, članova, budućih članova, donatora i drugih zainteresiranih učesnika kako bi podstakli, inspirirali, obrazovali i pomogli rad i kontinuiranu borbu protiv korupcije nacionalnih ogranaka GOPAC-a i njihovih članova pojedinačno. Tokom konferencije učesnici imaju priliku učestvovati u radu višednevnih radionica i sastanaka s drugim članovima GOPAC-a širom svijeta. To je prilika da se analizira napredak u radu, razmijene iskustva o borbi protiv korupcije i razvoju novih ideja na tom polju.

4.2. Učešće na regionalnim sastancima GOPAC-a

Kao podsticaj za formiranje ogranka u ostalim zemljama regiona, Ogranak GOPAC-a u PSBiH inicirat će regionalni sastanak s poslanicima parlamenata u regionu, tokom kojeg bi se razmijenile dobre prakse i iskustva u funkcioniranju ogranka GOPAC-a u parlamentima ovih zemalja. Posebnu pažnju Ogranak GOPAC-a u PSBiH posvetit će organizaciji i učešću na regionalnim sastancima s predstavnicima parlamenata država regiona koje još uvijek nisu postale članicama ove globalne organizacije. Cilj održavanja ovakvih sastanaka je formiranje regionalnog ogranka GOPAC-a, kojim bi se omogućila redovna komunikacija članova Ogranka GOPAC-a u PSBiH s poslanicima parlamenata zemalja članica GOPAC-a iz ovog regiona, kao i razmjena iskustava i međusobna pomoć na pitanjima suzbijanja korupcije i nadzora nad radom organa izvršne vlasti.